

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE ÉFESO

Pablo dxugape' diuzre bi chee Cristo zaj zre'e xezre Efeso

1 ¹Neda', Pablo, naca' gubáz chee Jesucristo lawe' da guca lazre' Dios gaca' caní. Dxuzúaja' da nigá cheele le'e, nácale bi chee Dios, ne dxeajlí lázrele Jesucristo, na' zrale xezre Éfeso. ²Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'.

Ca naca da chawe' da dxezí' lu nnadxu ne chee Cristo

³Dxue lá'anadxu Dios, Xra Xránadxu Jesucristo lawe' da ba bene' cheedxu ca naca xúgute da chawe' chee Be' Lá'azxa da zá'aca xabáa lawe' da nácadxu bi chee Cristo. ⁴Dios guqu'é dxi'u chee gácadxu bi chee Cristo gate quebe ne gunte' xezr la xu, chee gácadxu benne' lá'azxa, ne du lazre' lau Le'. ⁵Lawe' da bzri'ine' dxi'u, bene' cheedxu gate nate si' lu ne'e dxi'u ca bi cheéqueze' ne chee Jesucristo, cáteze da guca lazre' gune'. ⁶Chee le na', tu dxue lá'anazquezdxu Dios ne chee xel-la xrlátaje chee' da naca na szrente. Lu xel-la xrlátaje chee' na' gúcalene' dxi'u lawe' da nácadxu tuze nen Zrí'ine', bi nazri'ite lazre'. ⁷Ne chee Zrí'ine' na' naxá'awene' dxi'u nen dxen cheéqueze', na' lu xel-la zri'i lazre' zren chee' bnite lawe' cheedxu dxi'u ca naca dul-la da nabágadxu. ⁸Dios nazrí'ile'ene' dxi'u, ne dxunne' dxi'u xel-la sina, ne xel-la dxéajni'i, ⁹na' bzéajni'ine' dxi'u ca naca da dxaca lazre' da bgache na, da na' lu xel-la zri'i lazre' chee' ba núnqueze' gune' ne chee Cristo. ¹⁰Nuchague' xúgute da zaj

zua na xabáa, ne xęzr la xu, cheę xelú'u na lu na' Cristo, da gusexúzre' gunę' gate zrin zra cheę na.

¹¹Ne cheę Cristo Dios guquęle' dxi'u cheę gate nate, cheę si' lu nnadxu da xáladxu da gunna Le', ca da ba núnqueze Dios, Bénnea' dxune' xúgute' da dxeque Le' xrlátaje. ¹²Caní bene' cheę gácadxu tu da gucá'ana szren na xel-la szren cheę', nácadxu dxi'u benne' nedxu dxebeza lázredxu Cristo. ¹³Cá'aqueze le'e, gate benle dizra' li, da naca na dizra' chawe' cheę da ben Cristo, bselé' le'e. Guxeajlí lázrele Le', na' Dios bzue' Be' Lá'azxa lu xichaj lázrdaule ca tu da dxunna bea na nácale bi cheę', ca guchebe lazre' gunę'. ¹⁴Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi cheę' ca', cheę güe lá'anaquezdxu Le' ca naca xel-la szren cheę'.

Dxenaba Pablo gunezruj Dios xel-la sina cheę bi ca' cheę Cristo

¹⁵Cheę le' na' gate benda' ca dxeajlí lázrele Cristo, ne ca nazri'ile xúgute' bi ca' cheę Dios, ¹⁶dxápaqueza' Dios; Xcalenu', ca naca cheęle le'e gate dxuchálajlena' Dios, ne dxeajsá lázrqueza' le'e. ¹⁷Dxenaba' Dios cheę Xránadxu Jesucristo, naque' Xradxu zue' xabáa, gunę' le'e xel-la sina lu be' nácaquezle da gulé'e na le'e gúnbea xánnele Le'. ¹⁸Dxenaba' lau Dios guzėjni'ine xichaj lázrdaule le'e cheę nézele ca naca da dxebeza lázredxu da bláwizre' dxi'u sidxu, ne ca naca xel-la gunní'a cheę xel-la szren da gunezruj Dios bi cheę ca', ¹⁹ne ca naca xel-la waca zrentę cheę' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu dute xel-la dxenná bea zren cheę' ²⁰gate bsebanę' Cristo ládujla benne' gate ca', ne guleche' Le' chalá'a xabęla cheę' xabáa, ²¹ne bzue' Le' cheę nna bé'ene' xúgute' benne' blau xabáa, ne xúgute' benne' dxelenná bea xabáa, ne xúgute' benne' zaj napa xel-la waca, ne xúgute' benne' zaj naca xrane, ne xúgute' da dxelenná bea na lu zra na'a zra, ne lu da za za'. ²²Bzue' xúgute' da zaj zua lu na' Cristo, ne bzue' Le' gaque' benne' xíchaje cheę bi cheę ca' ca naca xúgute' da dxelune'. ²³Benne' caní zaj naque' ca bęla' dxen cheę Cristo, da dxulé'e na dute ca nácaqueze Le', Bénnea' dxusexuzre' dxucá'ana chawe' ca naca xúgute' da zaj zua.

Naca bandxu lawe' da nazrí'i Dios dxi'u

2 ¹Gate nate gúcale ca benne' gate lu xichaj lázrdaule ne cheę da calela ca', ne dul-la ca' ²da benle gate ne dxunle

ca dxelún bēnneache zaj zre'e xezr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzúe' dizra' chee Dios. ³Cá'anqueze dxi'u, xúgute_{dxu} bendxu caní gate nate, gate bendxu cáteze da guzá lázredxu, ne bendxu ca da gunná belá' dxen cheedxu, ne ca da gunná xichaj lázrdaudxu. Chee le na' guca na cheedxu sidxu da zi' da xa' chee Dios ca gune' chee xezícadxa benne' ca', ⁴san Dios bexache lázrele'e dxi'u, ne bzrí'ile'ene' dxi'u, ⁵na' benne' dxi'u xel-la nabán tu zren nen Cristo gate ne nátedxu lu xichaj lázrdaudxu ne chee dul-la da nabágadxu. Naladxu ne chee xel-la xrlátaje chee Dios. ⁶Cá'anqueze bsebán Dios dxi'u tu zren nen Jesucristo, ne guleche' dxi'u tu zren nen Le' xabáa. ⁷Bené' caní chee gulé'ene' lu zra da za za' ca nazrí'ile'ene' dxi'u, ne ca naca da cháwele'e bené' cheedxu ne chee Jesucristo. ⁸Lu xel-la xrlátaje chee Dios bselé' le'e lawe' da guxeajlí lázrele Cristo. Quebe naca na ne chee bi da benle le'e, san naca na tu da ben Dios cá'aze ne chee. ⁹Quebe nalá nu benne' ne chee bi da dxúnqueze', chee quebe nu benne' gucá'ana szren cuine'. ¹⁰Dios bené' dxi'u, na' bexune' dxi'u tuze nen Jesucristo chee gundxu da xrlátaje ca' da ba nun Le' gundxu gate nate.

Nácadxu tuze ne chee Cristo

¹¹Le gusá lázrele ca gúcale le'e gate nate. Quebe nácale benne' judío, benne' ca' dxelechugue' lu bel-la' dxen chee' da na' dxulé'e na zaj nababe' chee Dios, ne zaj nazí le' benne' zaj nadxugu, na' dxeleonné' chee nácale benne' quebe zaj nadxugu. ¹²Lu zra ca' quebe guzúale Cristo le'e. Quebe benle tuze benne' Israel ca', ne quebe bēnbeale ca naca xel-la wezría da ben Dios, ne ca naca da guchebe lazre' Dios. Guzúale lu xezr la xu nigá, ne quebe bi guleza lázrele, ne quebe bēnbeale Dios. Gate nate guzrale zítu'la naga zua Dios. ¹³Na'a ne chee Cristo Dios ba bzué' le'e gágute lawe' da gute Cristo waláz chee. ¹⁴Lé'queze Cristo benne' dxi'u xel-la dxebeza zri lazre', ne bexune' dxi'u tuze, netu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da ben na dxi'u chupa la'a, da guca na ca tu ze'e. ¹⁵Gate gute Jesús waláz cheedxu guchugue' da nadxixruj bea na da naca na da gunná Dios gundxu, ne da ca' dxeleenná bea na, na' bexune' dxúpaté xezre ca' tuze xezre cube da nababa na chee'. Caní gudíxruje'

xel-la dxebeza zri lazre' cheeḏxu. ¹⁶Caní guca ne chee xel-la gute chee Cristo le'e xaga béguaj, guchugue' naze xel-la dxezrá'a ljwezre chee dxúpatē xēzr ca', na' bexune' dxúpatē tuze bel-la' dxen, ne bexune' le' tuze nen Dios.

¹⁷Bla' Cristo, ne bzenne' le'e dizra' chawe' chee', le'e quebe nácale judío, na' guzrale zitu' naga zua Dios, ne le'e nácale judío, na' guzrale gagu naga zua Dios, ¹⁸na' ne chee Cristo, xúguteḏxu, benne' judío ca', ne benne' quebe zaj naque' judío, dxebígadxu lau Xradxu Dios ne chee Be' Lá'azxa. ¹⁹Chee le na' le'e, benne' quebe nácale judío, québedxa nácale ca benne' zitu' tu lu xēzr la xu da quebe naca na cheeḏle, san nácale benne' walazre' ca xúgute benne' ca' zaj nababa chee Dios. Nabábale Zri'ine Dios. ²⁰Nácale ca tu xu'u zren da zria na lawe' lane da gulixruj benne' gubáz ca' chee Cristo, ne benne' ca' buluchálajē' waláz chee Dios, na' Jesucristo nácaqueze' xiaj blau chee lane xu'u na'. ²¹Lawe' lane nigá da naca Cristo, dutē xu'u na' dxeḡula na tu li chee gaca na tu xudau' lá'azxa chee Xránadxu. ²²Cá'anqueze le'e, lawe' da nácale Cristo tuze, xu'ule lu xu'u na' naga zua Dios ne chee Be' Lá'azxa chee'.

Pablo dxuzenne' benne' quebe zaj naque' judío dizra' chawe'

3 ¹Chee le na' neda', Pablo, dxuzú zriba' lau Dios. Xu'a lizre xia lawe' da dxuna' zrin chee Jesucristo chee gaca chawe' cheeḏle le'e, quebe nácale judío. ²Ba nézele ca ben Dios lu xel-la xrlátaje chee', bsebage' neda' guchálaja' dizra' chawe' chee Cristo ládujla le'e. ³Lu da ble'e Dios neda' bzéajni'ine' neda' tu da nagache chee' ca da bzuaja' cheeḏle nedxu. ⁴Gate gulábale na weque bé'eqeuzle núnbe'a da nagache ca naca chee Cristo. ⁵Guca na tu da nagache gate nate. Dios quebe bzéajni'ine' na bénneache, san na'a ne chee Be' Lá'azxa chee' ba blé'ene' na benne' gubáz lá'azxa ca', na' benne' ca' dxuluchálajē' waláz chee'. ⁶Caní naca da nagache na': Ne chee dizra' chawe' chee Cristo benne' quebe zaj naque' judío welezí'queze' da gunezruj Dios le' ca da xelezí' benne' judío ca', ne zaj naque' tuze bel-la' dxen, ne xelezí'queze' tu zren da nachebe lazre' Dios ne chee Jesucristo.

⁷Dios bene' neda' wen zrin chee dizra' chawe' na' ne chee tu da bénneaze' neda', bchínene' xel-la waca zren chee'. ⁸Neda' nácadxa' benne' baxáche ca xúgute benne' zaj naca bi chee Dios. Bene' neda' tu culuén zren chee guzenda' benne' quebe

zaj naque' judío dizra' chawe' ca naca xel-la gunní'a zrente chee Cristo. ⁹Bsebage' neda' guzéajni'ida' xúgute bènneache ca da nun Dios guné' da bgache gate nate, na' naca Dios Bènnea' bene' xúgute da zaj zua, ¹⁰chee xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrente chee Dios. Xelúnbe'e na ne chee benne' ca' zaj naca bi chee Cristo. ¹¹Da nigá ben Dios ca da nune' gate nate gusexuzre' ne chee Xránadxu Jesucristo. ¹²Ne chee Cristo waca bígadxu lau Dios du lázredxu, ne duté xel-la dxuxrén lazre' cheedxu lawe' da dxeajlí lázredxu Le'. ¹³Chee le na' dxata' xúeda' le'e quebe gate ni'a na'le lawe' da dxedéa' xel-la zi' ne chee le'e. Xel-la zi' da dxedéa' neda' gaca na chee le tu da ba neza.

Xel-la zri'i lazre' chee Cristo

¹⁴Chee le na' dxuzú zriba' lau Xra Xránadxu Jesucristo, ¹⁵Bènnea' dxuzúe' la cha chee benne' zaj zre'e xabáa, ne xezr la xu. ¹⁶Dxenaba' lau Xradxu, ca naca xel-la gunní'a zrente chee' guzé tipe' le'e nen xel-la waca chee' lu xichaj lázrdaule ne chee Be' Lá'azxa chee', ¹⁷chee sua Cristo lázrdaule ne chee xel-la dxeajlí lazre' chee le, ne se cháchale lu xel-la zri'i lazre', ca tu xaga da nudé lue na sítujla, ¹⁸chee seque' chéajni'ile tu zren nen xúgute bi chee' ca nazriluj, ne ca natunna, ne ca nasituj, ne ca nasibe xel-la zri'i lazre' chee Cristo. ¹⁹Dxenaba' lau Dios gúnbeale xel-la zri'i lazre' na', lácala cabata' séquedxu gúnbeadxu duté ca naca na. Caní dxenaba' Le' chee suale le'e duté da nácaqueze Dios.

²⁰Na'a, gaca báqueze Dios, Bènnea' nape' xel-la waca gúnle'equeze' da zrendxa ca da dxenábadxu, u ca da dxéquedxu, ne chee xel-la waca chee' da dxun na zrin lu xichaj lázrdaudxu. ²¹Gaca ba Dios ládujla benne' zaj naque' bi chee Cristo ne chee Jesucristo xúgute iza chadía chacanna. ¡Ca'an gaca na!

Nácadxu tuze ne chee Be' Lá'azxa

4 ¹Chee le na' dxata' xúeda' le'e, neda', xu'a lizre xia lawe' da dxuna' zrin chee Xránadxu, chee gunle da xrlátaje ca dxal-la' xelún bènneache ba gucá'a Dios le', ca gucá'aqueze' le'e. ²Le gaca dxexruj lazre', ne zri'i lazre'. Le cueza lazre', ne le cue' gunne xue chee tule xetule lu xel-la zri'i lazre' chee le.

³Le gun ba xuzre gácaquezele tuze, guchínele xel-la waca chee Be' Lá'azxa lu xel-la dxebeza zri lazre' da na' dxun na le'e tuze.

⁴Tuze naca bela' dxen chee Cristo da nácadxu.

Tuze naca Be' Lá'azxa, Nu na' zúalene' tu tudxu.

Tuze da dxuxrén lázredxu, da na' sidxu lu na' Dios.

⁵Tuze Bénnea' naque' Xránadxu.

Tuze da dxeajlí lázredxu.

Tuze ca dxedxúadxu nisa.

⁶Tuze Bénnea' naque' Dios, ne Xra xúgutedxu.

Le' naque' Benne' xíchaje xúgutedxu.

Dxulé'e cuine' lu da dxundxu xúgutedxu.

Zúaqueze' lu xichaj lázrdau xúgutedxu.

⁷Tu tudxu nasidxu tu xel-la waca cha cheedxu

ca da nunna Cristo dxi'u.

⁸Naca na ca naxúaj na lu dizra' lá'azxa, dxenná na:

Begüene' xabáa, gate gudé bzétaje' benne' guledábague' Le'.

Na' bnézruje' bénneache xel-la waca ca'.

⁹¿Bi zéaje na, dxenná na: Begüene'? Zéaje na nédxula

bétaje' lu xezr la xu nigá. ¹⁰Bénnea' bétaje' nácaqueze' Bénnea' begüene' lu da blaudxa lu xabáa chee gaca bea na xu'u lu ne'e xúgute da de, ¹¹na' benne' cha cheedxu xel-la waca chee:

Gaca bál-ladxu benne' gubáz chee'.

Gaca guzendxu xezícadxu bénneache dizra' chawe' chee'.

Gácadxu xezícadxu benne' dxuxúedxu bi chee' ca'.

Na' gusededxu-be' xezícadxu.

¹²Ca'an bene' chee bpa'adxé' bi chee' ca' chee xelunbe' zrin xulucá'anabe' xrlátaje' bénneache ca' zaj naque' zruza ni'a na' Cristo:

¹³Chee gácadxu tuze ca dxéajledxu,

ne ca núnbeadxu Zri'ine Dios,

chee gácadxu benne' du lazre',

chee gácadxu cáteze nácaqueze Cristo.

¹⁴Caní nacan chee québedxa gácadxu ca bidu ca', bi ca' dxelezibe' bíteteze dizra' da zaj naca na ca tu be' da zeaj na nila na'la, ne québedxa güedxu lataj xelún zréaje benne' wen da zrinnaj ca' dxi'u, chee quebe xelezí xe'e dxi'u chee gundxu da calela. ¹⁵Lu xel-la zri'i lazre' dxal-la' guchálajdxu da li chee gácadxu cáteze nácaqueze Cristo, Bénnea' naque' xichaj bel-la' dxen da nácadxu dxi'u. ¹⁶Le' dxune' tuze xúgute ni'a na' zaj zria bel-la' dxen chee' chee gaca na tu bel-la' dxen nazá'ate

chee na, ne chee xelún zrin xúgute ni'a na' ca' chee gula bel-la' dxen na', ne gaca na chawe' lu xel-la zri'i lazre'.

Xel-la nabán cube da dxunna Cristo dxi'u

¹⁷Da nigá dxapa' le'e, ne dxusebaga' le'e waláz chee Xránadxu chee québedxa gunle ca dxelún bēneache quebe zaj núnbe'e Dios, benne' ca' dxelunē' cáteze dxeléquene' xrlátaje, ¹⁸benne' ca' zaj nachul-la xichaj lázrdawe'. Benne' caní quebe zaj nape' xel-la nabán li lazre' da dxunna Dios bēneache:

Zaj nachul-la nanítene', ne zaj naca zide' lázrdawe'.

¹⁹Québedxa dxelexedué'ene'.

Belezanne cuine' dxelunē' da schanni'.

Du lazre' dxelunē' xúgute da sban.

²⁰Qegá caní nazédele le'e chee Cristo, ²¹che da li xca' bēnele da dxuchalaj Le', ne nusédenē' le'e ca naca da li da zúale Jesús.

²²Ca naca da benle nédxula, le guzúa chalá'ala da gúcale lawe' da guzrínajle lu da sban da guzá lázrele.

²³Dxal-la' gácale benne' cube lu xichaj lázrdaule.

²⁴Dxal-la' gunle da naca chee benne' cube na' da ben Dios le'e chee gunle da naca na xlátaje, ne da li da naca na lá'azxa.

²⁵Chee le na' québedxa gun lázrele.

Le nne da li tule xetule lawe' da nácadxu ni'a na' tuze bel-la' dxen chee Cristo.

²⁶Che dxezrá'ale, quebe dxal-la' gunle dul-la, ne quebe zrá'ale scha'.

²⁷Quebe güele da xriwe' lataj guchixre chee na le'e.

²⁸Bēnea' guque' gubán québedxa dxal-la' cuane'. Dxal-la' gune' tu zrin chawe' nen ni'a ná'queze' chee gape' da gunézruje' benne' dxelexájrjene'.

²⁹Quebe nnele dizra' calela. Le guchalaj da naca na xrlátaje chee xelezé tipa benne' xelenne', ne xelezi'e na ba neza.

³⁰Quebe guzúa xáchele Be' Lá'azxa chee Dios, lawe' da zúale Be' le'e chee gaca bea na nácale bi chee Dios ca zrindxa zra xezí' lu ne'e dxi'u.

³¹Le guzúa chalá'ala:

Xel-la dxecuide', ne xel-la dxezrá'a, ne xel-la xichaj zra'a, ne xel-la wetil-la dizra', ne xel-la wechacha, ne xúgute da zrinnaj.

³²Dxal-la' gácale du lazre', ne xache lázrele tule xetule, ne gunite laule chee tule xetule ca ben Dios,

bnite lawe' chee le'e lawe' da nácale bi chee Cristo.

Ca dxal-la' xelaca bi ca' chee Dios

5 ¹Lawe' da nácale bi cheequeze Dios, bi nazri'ine, le gun ba xuzre gácale cáteze nácaqueze Le'. ²Le zri'i le sa' ljwézrele tule xetule cáteze ben Cristo, bzri'ine' dxi'u, ne bzanne cuine' waláz cheedxu ca tu zríla'dau', béadu dxelute benne' lau Dios chee xedúa xtul-le'. Gate gute Cristo le'e xaga béguaj, guca ca tu da dxelá zixre lau Dios da dxelegú'u bèneache lau Le'.

³Lawe' da nácale bi chee Dios, québedxa dxal-la' guchálajle chee da dxucá'ana ditaj na bèneache, ne chee da sban ca', ne chee xel-la wecude' da de. ⁴Quebe guchálajle dizra' schanni', ne dizra' bize, ne dizra' calela, da quebe dxulucá'ana na chawe' bèneache, san dxal-la' xéquezle Dios: "Xcalenu'." ⁵Ba nézquezle quebe chu'u naga dxenná bea Cristo nen Dios netú benne' dxucá'ana dítajé' bèneache, u tu benne' dxune' da sban, u tu benne' dxucúdie' da de, da naca na ca dxucá'ana szrene' bedau' xiaj xaga. ⁶Quebe güele lataj nu si xé le'e nen dizra' xala, lawe' da ne chee da nigá dxesel-la Dios da dxusaca zi na benne' ca' quebe dxuluzúe' dizra' chee'. ⁷Quebe gunle tu zren benne' dxelune' da caní.

⁸Nédxute guzúale lu da chul-la, na' na'a zrágale xel-la naxaní' lawe' da nácale bi chee Xránadxu. Chee le na', le gun da naca na chee xel-la naxaní', ⁹da na' naca xel-la dxucá'ana chawe' ljwézredxu, ne da xlátaje, ne da li. ¹⁰Le gun zi' lázrele nézele gunle da dxezaca ba lazre' Xránadxu. ¹¹Quebe gunle tu zren benne' dxelune' da calela, da ca' naca chee da chul-la, san le til-la da ca' ¹²lawe' da naca na tu da xedué'edxu guchálajzedxu chee da dxelún benne' ca' bagácheze. ¹³Gate dxeledxúaj da caní lu da chul-la, ne zaj xu'u na lu xel-la naxaní', gulé'e lawe' ca zaj naca xúgute' da caní, lawe' da dxulé'e lawe' xel-la naxaní' xúgute'. ¹⁴Ca naca da caní dxenná na:

Bebán, lue' dxásiu'.

Bexasa ládujla benne' gate,

na' gusení' Cristo lu xichaj lazrda'u.

¹⁵Chee le na', le guxúe xanne' ca da dxunle. Quebe gunle ca dxelún benne' zaj nachul-la nanítene', san le gun ca dxelún benne' zaj naxéajni'ine'. ¹⁶Le guchine chawe' zra caní lawe'

da dxácale'e da zrinnaj lu zra na'a zra. ¹⁷Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu. ¹⁸Quebe súzrele, da na' dxuxrinnaj na bèneache, san du lázrele le si' Be' Lá'azxa. ¹⁹Le guchálajle le sa' ljwézrele tule xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. Du lázrele le gul-la, ne le güe lá'ana Xránadxu. ²⁰Le xéqueze Xradxu Dios: "Xcalenu'", chee xúgute lu La Xránadxu Jesucristo.

Ca dxal-la' xelún bi chee Cristo nen lwézrebe'

²¹Le gaca dxexruj lazre' tule xetule, ne le gapa ba lá'ana Dios.

²²Nu'ula dxal-la' gaque' dxexruj lazre' lau benne' chee', cáteze dxal-la' gaque' lau Xránadxu, ²³lawe' da naca benne' biu xíchaję chee zru'ule', cáteze naca Cristo xíchaję chee bi chee' ca'. Cristo naque' Benne' weselá chee bi chee' ca', bi zaj naca be' ca bel-la' dxen cheéqueze'. ²⁴Cáteze zaj naca dxexruj lazre' bi chee' ca' lau Cristo, cá'anqueze nu'ula dxal-la' gaque' dxexruj lazre' lau benne' chee' lu xúgute.

²⁵Benne' biu dxal-la' zrí'ine' zru'ule' cáteze ben Cristo, bzri'ine' bi chee' ca', ne bzánene' xel-la nabán chee' ne chee'be'. ²⁶Caní bene' chee bebéaję-be' cheéqueze', ne ben chi'e-be' ne chee dizra' chee', da guca na ca dxun benne' dxexibe' bi chee' nen nisa, ²⁷chee guzúe'-be' lau Le', xelácabe' bi xabáa, ne quebe bi da sban zaj nápabe', ne netú da zrinnaj, ne netú da naca na ca da ca', san xelácabe' lá'azxa, ne du lazre'. ²⁸Cá'anqueze benne' biu dxal-la' zrí'ine' zru'ule' cáteze nazri'ine' bel-la' dxen cheéqueze'. Benne' nazri'ine' zru'ule' nazrí'i cuine'. ²⁹Netú benne' quebe dxecuídene' bel-la' dxen cheéqueze', san dxugawe' na, ne dxuxúe' na, ca dxúnqueze Cristo chee bi chee' ca' ³⁰lawe' da zaj nácabe' ca bel-la' dxen cheéqueze', na' dxi'u nácadxu ca ni'a na' bel-la' dxen chee', ne nácadxu ca bel-la' dxen chee', ne zrita chee'. ³¹Chee le na' tu benne' biu dxal-la' gusanę xra xrne'e chee gaque' tuze nen zru'ule', na' dxúpate' xelaque' ca tuze benne'. ³²Da nigá naca na tu da zren da nagache, na' dxennía' da caní ca naca chee Cristo nen bi chee' ca'. ³³Cá'anqueze tu tule le'e dxal-la' zrí'ile zrú'ulale cáteze nazrí'i cuinale, na' nu'ula dxal-la' gape' ba lá'ana benne' chee'.

6 ¹Le'e, bi cuide', lawe' da nácale bi chee Xránadxu, dxal-la' guzúale dizra' xruze xrna chee, da naca na xlátaję.

²Da nadxixruj bea nedxu da zraga na tu da guchebe lazre' Dios naca na da dxenná na: Gudapa ba lá'ana xra xrna'u, ³chee gaca chawe' chiu', ne chee su' scha' lu xezr la xu.

⁴Le'e, xruze xrna', quebe guchá'ale zrí'inele. Le gusegula-be' lu xel-la dxenná bea chee Xránadxu, ne le gusina-be' da naca chee Le'.

⁵Le'e, benne' nada'u, le guzúa dizra' chee benne' zaj naque' xránale lu xezr la xu nigá, ne le gapa le' ba lá'ana, ne le zrebe le', ne du lázrele le gaca chee', cáteze dxuzúale dizra' chee Cristo. ⁶Le gun zrin chee xránale ca', quegaze gate dxelenná'te' le'e, ca dxelún benne' ca' dxelaca lazre' xelezaca ba lazre' bénneache chee'. Le gun zrin na' cáteze dxunle zrin chee Cristo, gunle du lázrele da dxaca lazre' Dios. ⁷Le gun zrin chee xránale du lázrele, cáteze dxunle zrin chee Xránadxu, ne quegaze chee bénneache. ⁸Ba nézquezle tu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nune'.

⁹Le'e, xrana benne' ca', cá'anqueze le gun le'e nen benne' wen zrin chee ca', ne quebe guzálajle le' lawe' da nézele zua Bénnea' xabáa naque' Xrana benne' ca', ne Xránale le'e, na' Le' quebe dxebéaje' cha chee bénneache.

Zra lana bi chee Cristo da dxácale lebe' lu wedil-la

¹⁰Na'a, bi bícha'dau', le gaca chuchu ne chee Xránadxu nen xel-la wala zren chee'. ¹¹Le gaca ca benne' zjaque' wedil-la zaj nácu'e' zra lan'e' xia da na' dxunna Dios le'e, chee gaca se chúchule lau xúgute da dxuzé da xriwe' laule chee si xe na le'e. ¹²Quegá dxedíl-laledxu bénneache zaj naque' belá' dxen. Dxedíl-laledxu xel-la dxenná bea chee da xriwe' da dxeledá na lu be', ne dxedíl-laledxu be' xriwe' ca', da dxelenná bea na, ne be' xriwe' ca' dxé na ljwezre ca' da xelún na, ne be' xriwe' ca' xu'u lu na' na xezr la xu chul-la nigá. ¹³Chee le na', le gaca ca benne' zjaque' wedil-la zaj nacue' zra lan'e' xia da dxunna Dios le'e, chee séquele súa'le wedil-la lu zra che da xriwe', na' ca te na' xegá'ana chúchule. ¹⁴Le se chuchu xca', suale le'e da li ca tu bazxu da nacá'a na le'e, ne suale le'e da xlátaje ca tu xia da da' lachu'le. ¹⁵Le gaca sina chee guchálajle dizra' chawe' chee xel-la dxebeza zri lazre', da gaca na chee ca tu cue' zré'le. ¹⁶Da dxun na ba xen, le gapa xel-la dxeajlí lazre', da gaca na chee ca tu da xegapa na, da xusula na xúgute da zaj nalá na

zaj zua na xi' da dxuzala da xriwe'. ¹⁷Xel-la weselá gaca na cheēle ca tu lapa xia da gucache xíchajle, na' xrtizra Dios gaca na cheēle ca tu xia da gunna Be' Lá'azxa le'e. ¹⁸Gate ne dxunle da caní dxal-la' guchálajlēle Dios, gata' xúele, ne nábale lau Le' ne cheē Be' Lá'azxa. Cheē gaca gunle da caní dxal-la' súale ban lazre', ne quebe gate ni'a na'le, na' nábale Dios cheē gácalenē' xúgutē bi cheē' ca'. ¹⁹Cá'anqueze le naba Le' waláz chia' neda' cheē gunne' neda' dizra' da guchálaja', cheē xazrda' guzenda' bénneache dizra' chawe' chee'. ²⁰Dios bene' neda' gubáz cheē dizra' chawe' chee', na' cheē le na' xu'a lizre xia na'a. Le naba Le' gácalenē' neda' cheē xazrda' guchálaja' dizra' chawe' chee' ca dxal-la' guna'.

Pablo dxugape' diuzre le sa' ljwezre'

²¹Tíquico, bi bíchedxu nazri'itē lazrdxu, bi li lazre' lu zrin cheē Xránadxu, guzenbe' le'e da dxaca chia' nigá, ne da dxuna'. ²²Cheē le na' dxusel-la'-be' lau le'e cheē guzenbe' le'e ca zúantu', ne cheē gutípabe' lázrele.

²³Dxenaba' lau Xradxu Dios, ne lau Xránadxu Jesucristo gunézruje' bi bíchedxu ca' zaj zre'e na' xel-la dxebeza zri lazre', ne xel-la zri'i lazre', ne xel-la dxeajlí lazre', ²⁴na' gune' chawe' xúgutē benne' ca' du lazre' zaj nazri'inē' Xránadxu Jesucristo. Ca'an gaca na.